

Middeweeek!

Narren un Spaaßvögels



van Manfred Briese

De Autokenntekens ver-raden 't: Ut all oost-freeske Kuntreien sünd se all de Jahr komen, in Esens Schützenfest to fieren. Van-jahr weer 't, Corona wull dat so, eerst nu in September-maant so wied. Man ditmaal blot Beer, Karussells un Braadwust up de Schützen-platz. Un alltied mooi de Of-stand hollen. Sünner Festtelt un Danz un Umtögen.

De Maandagsumtog vör 'n paar Jahr geiht mi neet ut de Sinn. As de Steert van de Um-tog nahder keem, muss ik tweemaal henkieken. Peerd un Wagen süchst du neet mehr so faak up de Straat. Un wenn, denn sünd een of twee Peer an de Dießel, up de Bück sitt de Kuutsker un hollt de Tögels.

In disse Umtog weer dat anners. Boven un Unnern weren vertusket. Neet Peer-Mannlüü trucken de lüttje Kreitwagen. Man Peer weren d'r ok bi. De stunnen boven up de Wagen un keken d'r heel neet anners bi üt!

An de Sied en groot Schild: „Peiers“. So nöömnden se sük, de Keerls an de Dießel. Peiers, Peiassen - Narren, Kürenmakers, Spaaßvögels. De hullen fröher mit Spijööck de Könenken en Spegel vör.

Of dat bi de hoge Heren van uns Stadt woll nödig weer, na hör Menen? Bi de Börgmes-ter un de Raadsheren, de groot Kooplüü un de Beam-te?

As de Wagen vörbi weer, kann 'n an 't Achterenn lesen: GNÖTHI SEAUTON.

Doch wat „Gnothi seau-ton“ to bedüden hett - keen Henwies. Keen Verklaren. Nix keen Hülp!

So licht wullen se 't de To-kiekers woll neet maken. Well dat weten wull, kann ja in sien Smartfoon nakieken. (Well neet fraggt, blifft dumm!)

De Peiers weer antosehn, wovööl Pläseer se an de un-künige Gesichten harren.

Gnothi seauton: Steiht in Delphi an de Apollontempel. Sall van de Philosoph Thales van Milet wesen. Heet: Worr wies over di sülvst! Wo dat geiht?

Fraag de Spegel, of du wür-rek de Mooiste büst, of dat woll recht is, wat du in de Jahren daan of unnerlaten hest. Ehrelk to sük sülvst wesen. Van Grund of an anners denken. eenfach maal de Peer up de Wagen, de Mins-ken an de Dießel. Dat Un-nerste na boven. De Kujoneerten an de Macht.